

Gemellàggju tra lu Cumuni di Lungoni e lu Cumuni di Bonifàziu

Lu Cumuni di Lungòni di la Repùblica Italiana e lu Cumuni di Bonifàziu di la Repùblica Francésa, chici infattu annummati “li Palti”,

- postu a innanzi chi divintendi “cuppíuli”, li Palti vóni fulmà e mantiné li ami folti, chi fèlmani illu tempu e cun pruvettu, fendi prugjetti insemi rifulzati da un cumprindissi tra paru comu fundamentu chi selvi pa’ trabaddà be’ insemi;
- postu a innanzi chi li Palti, pa’ lu fattu chi so accultu comu tarrittórii chi s’assumíddani illi lóchi e illa folma, ani fauritu incontri e scàmbii infrà di l’assuciazioni e di la gjenti cu’ lu scopu di prummuí li tradizioni di lu lócu e li sintimenti d’amistai infrà di li cittadinanzi, sempri adduchendi dugnunu li so’ identitai e lu liamu cu’ li cumunitai di fundu;
- tinendi prisenzi chi tra li Palti vi so liami fundati di tipu culturali e piú e piú linghísticu, vistu cantu s’accostani la linga gaddurésa e la linga cossa;

infrà di li próppii mezi, appòstani cantu sighi:

Alticulu 1

(Scopi chi si vóni raggiugnì)

Cun chistu scrittu, divintendi “cuppíuli”, li Palti appòstani di vulé tiné liami comu fráteddi e chi sìghini illu tempu ill’almenti di la cultura, di la linga, di lu sport, di lu turismu, di la scóla, di lu malcatu e di la cittadinància europea.

Scopu di chistu scrittu è d’arrià a lu sviluppu sociali e culturali di dugna cumunitai pal mezu di li próppii cunniscenzi, scàmbii e collaborazioni, in manéra di puní in luci li raichi linghístichi e culturali chi ani precisi li dui cittadinanzi, ma ancóra chi fòccini vidé li diffarenzi com’è signali di arricchimentu di dugna passona présa dapparèdda e insemi a l’alti.

Alticulu 2

(Puntu di invariància di la régula)

Lu prisenzi scrittu sarà appustatu illu rispettu di li leggi italiani e francési, e ancóra di lu dirittu internazionali chi si pó sighí e di l’ubbrichi chi vènini da lu fattu chi l’Itàlia e la Frància appaltènnini a l’Unioni Europea.

Altículu 3

(Attivitai di collaborazioni)

Cu' lu scopu di sighí li punti di l'altículu 1, li Palti appostarani, illi settóri chi li cumpétini, l'attivitai d'impultànzia internazionali chi síghini.

Pa' li matérii linghístichi e culturali:

1. cunfarènzi, cunvegni, prisentazioni e abboi culturali;
2. scàmbii di pubblicazioni;
3. prémii littaràrii in linghi minoritàrii;
4. mustri e altu eventi espositivi;
5. prugjetti di cilca e stúdiu;
6. prugjetti illi matérii di traduzioni;
7. appustamenti di sèmiti culturali pa' la cunniscènzia e lu sapé di piú innantu a lu patrimóniu stóricu e altísticu.

Illa matéria spultiva:

1. gari e manifestazioni;
2. eventi pa' prummuí lu stà be' físicu e mentali pal mezu di la pràttica spultiva.

Illi matérii turístichi e di lu malcatu:

1. prummuí e scambià li tradizioni pupulari e di l'alimentu;
2. appustamentu di sèmiti e camini turístichi insemi;
3. piddà palti a malcati, fieri, esposizioni di prudutti;
4. occasioni di scàmbiu e abboi tra oparadóri ecunómichi di li dui cumunitai.

Illi matérii educativi e di la cittadinànzia europea:

1. scàmbii linghístichi tra sculani;
2. prugjetti di peer education tra sculani e ciòani;
3. sèmiti di scàmbiu e discussioni e cuntrasti fatti insemi a li dui cumunitai innantu a l'argumentu di la integrazioni europea.

Altículu 4

(Pruggettazzoni cumpaltuta)

Li Palti appòstani di pultà a innanzi, cunfolma a l'aggjuti di passoni e di dinà chi agàttani e cu' un pruggettlu fattu apposta, folmi di co-pruggettazzoni cu' lu scopu di agattà fundi da fóra, piú e piú comunitàrii e priati, pa' lu finanziamentu di li prugjetti di fà pa' divintà "cuppíuli" comu dici chistu scrittu.

Altículu 5

(Puntu di neutralitai finanziària)

Tutti l'attivitai appustati o chi pàltini da lu puní a puntu di chistu scrittu, sarani carraggjati, pa' la Palti italiana, da lu bilànciu di lu Cumuni di Lungoni, chena pultà spési finanziàrii a gàrrigu di lu Statu.

Alticulu 6

(Infulmativa)

Li Palti infolmarani l'Ambasciati competenti dognunu pa' lu so' tarritóriu illi Paési innantu a cantu so andendi a innanzi li trabaddi appustati com'e scopu di chistu scrittu.

Alticulu 7

(Mutamenti e aggiungi)

Altu mutamenti o aggiungi a lu presenti scrittu podarani esse impustati pa' scrittu dapói d'accoldu di li Palti e, pa' la Palti italiana, illu rispettu di pruzziduri chi s'assumíddani a chissi appustati pa' l'appróu di lu scrittu presenti.

Alticulu 8

(Mal cumprindugni liggjendi)

Cassisia mal cumprindugnu liggjendi o punendi in attu lu scrittu presenti venarà risoltu cun amistai, pal mezu di cuntrasti e cjarimenti tra li Palti.

Alticulu 9

(Efficàzia e durata)

Lu Scrittu presenti pidda efficàzia illu mumentu di la filma e arà durata di cincu (5) anni. Chistu sarà direttamenti rinnuatu pa' altu tretti di tempu di cincu (5) anni, francu diffarenti vulintai posta in cjaru da li Palti di signalà alumancu tre (3) mési primma di la data appustata pa' lu rinnóu e illu rispettu di li pruzziduri appustati da dognunu di l'oldinamenti.

Dugna Palti podarà fà cumprí in cassisia mumentu chistu scrittu pal mezu di cumunicazioni scritta a l'alta Palti.

Filmatu in _____ la dí _____ di _____ di lu _____ in due (2) còpii originali, dognuna illi linghi italiana, francésa, cossa e gaddurésa, dugna testu fendi mattessi fidi.

*Pa' lu Cumuni di Lungoni
La Sìndaca*


Nadia Matta

*Pa' lu Cumuni di Bonifàziu
Lu Sìndacu*

Jean Charles Orsucci



Cumuni di
Lungoni



**REGIONI AUTONOMA DI LA SALDIGNA
REGIONE AUTÒNOMA DE SARDIGNA
REGIONE AUTONOMA DELLA SARDEGNA**

Progèttu finanziàtu da la Legghji 482 di lu 1999, altìcculi 9 e 15 e Legghji Regionali 22 di lu 2018 Annualitài 2024